

四庫全書

子部

欽定四庫全書

子部

景岳全書卷四十四

詳校官太醫院吏目臣周世泰

編修臣倉聖脈覆勘

總校官原任中允臣王燕緒

校對官原任編修臣勵守謙

謄錄貢生臣黃嵩齡

欽定四庫全書

景岳全書卷四十四

明 張介賓 撰

痘瘡 中

總論治法

二十二  
共十九條

痘瘡一證順者不必治逆者不能治所當治者惟險證耳何為險證如根窠順而部位險部位順而日期險日期順而多寡險多寡順而顏色險顏色順而飲食

險飲食順而雜證險雜證順而治療險治療順而觸穢險然猶有最險者則在元氣與邪氣邪氣雖強元氣亦強者無害只恐元氣一餒邪氣雖微者亦危設或犯之而不為速治則順者不順而吉變為凶矣凡此數者皆痘中之要領所當詳察詳辨也故凡欲治痘必須先識死生辨虛實審寒熱明此六者則盡之矣

一治痘之要惟邪氣正氣二者而已凡邪氣盛而無制

者殺人正氣虛而不支者殺人及其危也總歸元氣  
之敗耳使元氣不盡則未必至死凡治此者但知補  
瀉二字而用之無差則盡善矣故補瀉難容苟且毫  
釐皆有權衡必不可使藥過於病亦不可使藥不及  
病是以善用攻者必不致伐人元氣善用補者必不  
致助人邪氣務使正氣無損而邪氣得釋能執中和  
斯為高手然執中之妙當識因人因證之辨蓋人者  
本也證者標也證隨人見成敗所由故當以因人為

先因證次之若形氣本實則始終皆可治標若形質原虛則開手便當顧本若謂用補太早則補住邪氣此愚陋之見也不知補中即能托毒灌根即能發苗萬無補住之理是以發源之初最當着力若不有初鮮克有終矣此可與智者言不可與庸人道也

一治痘不宜遲凡痘瘡之有不同者無過寒熱虛實四證大都寒則虛熱則實虛寒則宜溫補實熱則宜清解然其挽回之力當於三五日前治之過此則恐無

及若七日之後毒發於外外不足則外剝而死若毒發不盡則又內傳內不足則內攻而死故治毒有時時之不可失也有如此倘初時不慎則後來之禍從此伏矣

一解毒當知表裏所謂毒者火毒也所謂解毒者求其所在而逐之也蓋痘瘡之發內則本於淫火外則成於風邪內外相觸其毒乃發故其發也不甚於內則甚於外甚於內者以火邪內盛而熾熾於外也甚於

外者以寒邪外閉而鬱火於內也故但察其無汗外熱而邪在表者則當疎之散之使熱邪從外而去則毒亦從外而解矣若察其多汗內熱而邪在裏者則當清之利之使熱邪從內而泄則毒亦從內而解矣其有內熱既甚而表邪仍在者則當表裏相參酌輕重而兼解之則邪必皆散矣若邪不在表則必不可妄兼發散以致表氣愈虛而痘必終敗其證則身有汗而外不甚熱者是也若毒不在裏則必不可兼用



寒涼以致中寒脾敗而毒必反陷其證則口不渴而  
二便不秘者是也知斯五者則解毒治實之法無餘  
蘊矣此外有虛邪虛火等證則當先酌元氣次察邪  
氣無使失楫中流顧本不及則尤為切戒○凡云痘  
毒者痘必自內而達外但得出盡則內無毒但見化  
盡則外無毒既出既化而不使復陷則毒盡去矣故  
或宜散表或宜托送或宜清解或宜固中而治法盡  
之矣

一補虛當辨陰陽凡痘瘡血氣各有所屬已見前氣血條中然痘之所主尤惟陰分為重何也蓋痘從形化本乎精血凡其見點起脹貫漿結痂無非精血所為此雖曰氣為之帥而實血為之主且痘以陽邪陽盛必傷陰所以凡治痘者最當重在陰分宜滋潤不宜剛燥故曰補脾不若補腎養陰所以濟陽此秘法也然血氣本自互根原不可分為兩如參芪白朮之類雖云氣分之藥若用從血藥則何嘗不補血歸芎地

黃之類雖云血分之藥若用從氣藥則何嘗不補氣故凡見氣虛者以保元湯為主而佐以歸地血虛者以四物為主而佐以參芪蓋氣血本不相離但主輔輕重各有所宜而用之當不則明拙自有差耳

一治痘有要方茲表而出之以便擇用其有未盡當於各條求之

凡解表諸方乃初熱時所必用者諸家皆以升麻葛根湯為首程氏則用蘇葛湯似為更妥余則常用柴

歸飲以無營衛似為尤妥此當隨宜擇用○營虛表不解者五柴胡飲○陽氣虛寒表不解者柴葛桂枝湯○元氣本壯而表不解者疎邪飲或加減參蘇飲○寒氣勝而表不解者五積散或麻黃甘草湯

凡清火解毒諸方所以解實熱也如欲解毒清火而無養氣者惟四味消毒飲為妙鼠粘子湯亦佳○熱毒兩盛而不化者宜搜毒煎○煩熱作渴小水不利者導赤散六一散○血熱赤斑煩燥多渴者犀角散

○熱在陰分而失血者玄參地黃湯○肉熱不清者東垣涼膈散○二便俱不利而火盛於內者通關散○熱毒內蓄小水不利而為丹為癰者大連翹飲○煩熱多驚而神不安者七味安神丸○熱毒內甚而狂妄者退火丹

凡表裏兼解諸方如內外俱有熱邪者宜柴葛煎或柴胡麥門冬散○裏邪甚而表邪微者解毒防風湯○表裏俱有邪而元氣兼虛者實表解毒湯○表裏

俱實熱者雙解散

凡托裏諸方有宜專補元氣者有宜兼解毒者如氣血俱虛不起者六物煎或托裏散○虛寒不達無托無表者參芪內托散或十宣散○氣分虛寒不透者六氣煎○氣血俱虛微熱不起者紫草快癍湯

凡諸補劑皆痘中元氣根本祛邪托毒者之所必賴但見虛邪必當以此諸方為主○氣分不足者調元湯○氣虛宜溫者保元湯六氣煎○氣虛微熱宜兼

涼解者參芪四聖散○血虛者四物湯芎歸湯○血  
分虛寒宜溫者五物煎○血虛血滯者養血化癥湯  
○血虛血熱宜兼解毒者涼血養營煎○氣血俱虛  
者六物煎八珍湯十全大補湯○氣血虛寒大宜溫  
補者無如九味異功煎六味回陽飲即陳氏十一味  
木香散十二味異功散但虛寒而兼氣滯者宜用之  
欲賴補虛大有不及

凡攻下諸方亦痘中所不可無惟必不得已然後用

之勿得視以為常也○血虛秘結大便不通者四順  
清涼飲○裏實多滯秘結者前胡枳殼湯○表裏俱  
實大便不通者柴胡飲子○血熱便結毒盛者當歸  
九

一凡痘出已盡內無不虛蓋隨痘而為托送者皆元氣  
也使於此時不知培補化源則何以貫漿何以結痂  
何以收靨倘內虛無主漿恐毒氣復陷無不危矣若  
痘之稀疏者氣血之耗猶為有限若痘之多而甚者



其氣血內虧必更甚矣此不可不預為之防也

一平順之痘毒原不甚既出之後內本無邪此輩原不必治無奈父母愛子之切且不識病之輕重故必延醫診視既延醫至無不用藥既已用藥無非寒涼在彼立意不過曰但解其毒自亦何妨不知無熱遭寒何從消受生陽一拔胃氣必傷多致中寒泄瀉猶云協熱下利更益苓連最可恨也又如痘瘡初見發熱每多不審虛實止云速當解毒凡於十日之外多有

泄瀉而致斃者皆此輩之殺之也。究哉究哉。余見者多矣。故筆諸此。以為孟浪者戒。

一痘在肌肉陽明主之故。自出齊以後。最不宜吐瀉。與其救治於倒陷之後。孰若保脾土於未壞之先。故凡生果茶水之類。皆宜慎用。而寒涼之藥。尤不可不慎也。

一治痘須辨其證。大都濕多則泡血熱。則斑氣不足。則頂陷血不足。則漿毒不附。裏實太補。則生癰毒。表實

太補則不結痂裏虛不補則內攻而陷表虛不補則外剝而枯但使周身氣血活潑無碍則雖密亦不難治故惟貴得中勿使偏勝則寒熱虛實自無太過不及之患斯足云盡善矣

一秘傳治痘之法首尾當以四物湯為主隨證加減用之惟肚腹不實者須遠當歸但將全劑通炒微焦則用自無碍且復有溫中煖脾之妙

一首尾皆忌汗下此先哲治痘之心法蓋妄汗者必傷

陽氣陽氣傷則凡起發灌漿收靨之力皆失所賴此表虛之為害也妄下者必傷陰氣陰氣傷則凡臟腑化源精神鎖鑰飲食倉廩皆為所敗此裏虛之為害也然表虛者猶賴裏氣充足可以充之裏虛則根本內潰衛氣亦從而陷無策可施矣故古人深以汗下為戒誠至要之旨也然此以常道為言非所以應變者設遇外感寒邪腠理閉密其出不快其發不透者若不用辛甘發散之劑以通達肌表則痘有壅遏之

患矣又若有大小便秘結而毒有留伏不達者不與苦寒泄利之藥以疏通臟腑則有脹滿煩燥焦紫黑陷等患矣故當察其虛實審其常變當汗則汗當下則下中病則已無過其制若無汗下之證則必不可妄用汗下以賊人之命也務得其宜然後謂之明醫而福自有歸矣

一萬氏曰解其火毒恐鬱遏而乾枯養其血氣欲流行而舒暢按此說誠善然所謂火毒者以實熱為言若

火有虛實真假則不得槩論為火毒

程氏曰痘瘡出自六腑先動陽分而後歸陰經其本屬陽故多發熱而陰血虛耗者多也首尾當滋陰補血為主不可一毫動氣貴從緩治所以白朮半夏之燥悍升麻之提氣上衝皆不可輕用也且痘瘡多有血熱者故宜用四物加芩連之屬以養其陰而退其陽也

程氏曰痘毒根於淫火必因歲氣傳流而發故多兼表

證則內外交攻此時若不用輕揚之劑祛風散邪淡  
滲解毒之藥利便退熱則外邪內火何由得解邪既  
不解則痘何由得善此治之不容已也然治之之法  
必須審兒形色察兒虛實因證用藥庶獲神效世之  
醫者多宗錢氏清涼解毒之論或按陳氏辛溫發散  
之方主見不同致誤多矣殊不知痘疹色灰白不起  
發根窠不紅活此皆虛寒必宜陳氏方救之苟非理  
明於心鮮不眩惑故必熱則涼之寒則溫之虛則補

之實則瀉之何患乎疾之不愈耶

程氏曰治痘之要始出之前宜開和解之門既出之後當塞走泄之路落痂之後清涼漸進毒去已盡補益宜疎

程氏曰凡治痘前後須加木通以瀉熱邪自小便中出不使攻胃令無變黑之證七日之後熱退者少用之  
○凡痘瘡前後總有危證萬勿用天靈蓋腦射之屬攻之蓋毒出一步則內虛一步血氣運一日則內耗



一日豈可復用辛香耗氣之劑雖僥倖偶中後必有餘害也是可見王霸之殊相去遠矣

程氏曰凡婦人有孕而出痘者以安胎為主氣虛者保元湯血虛者四物湯或加白朮黃芩砂仁陳皮必使胎氣無損為主

程氏曰桂巖鄭先生云痘者象其形而名之也愚謂不獨象形而名而治之之法亦猶農家之種豆也豆之為物土實則難出土瘠則難長故實者鋤耨之瘠者

灌沃之不實不瘠惟順其性不使物害之而已知此則可以語醫矣今人於痘初起不察虛實寒熱或過用木香散異功散之類則以火濟火致變紫黑倒陷癰毒吐血者有之或妄用芩連梔栝寒涼之藥則大傷脾胃為吐為瀉為寒戰內陷者有之故凡治痘之法六日之前不宜溫補亦不宜妄用寒涼師云凡解毒之內畧加溫補溫補之中畧加解毒此不傳不刻之秘訣也若六日已後毒已盡出於表當溫補而不

溫補者膿不得壯而癢痛寒戰之患必所不能免矣

熱證論治

二十三  
共十一條

古云痘疹之病皆由父母胎毒伏於命門相火之中故每遇二火之令或主客溫熱之氣即觸發而動此痘疹屬陽固無疑矣然陽毒陽邪無熱不成亦無熱不散所以非熱不能出現非熱不能起發非熱不能化漿非熱不能乾漿此痘瘡之終始不能無熱亦不可無熱也但熱貴其微不宜其甚蓋熱甚者毒必甚而

痘亦必重熱微者毒亦微而痘出必輕無熱則不成不化此熱固痘之常也所以凡治痘瘡不可盡除其熱若必欲盡去之則未有不成陰證而敗者矣

一痘有三火蓋痘疹二證皆言為火者是矣然軒岐之火義有三曰太過曰平氣曰不及也太過之火是謂赫曦炎烈之氣也其毒甚治宜清解平氣之火是謂升明蕃茂之氣也其毒平不必治之不及之火是謂伏明屈伏之氣也其毒陷治宜培補此陰中有陽陽

中有陰之大義而亦痘疹萬病之法旨使不知此尚敢云醫

一治熱當知微甚及有毒無毒斯無謬誤蓋痘疹屬陽無不發熱若外雖發熱而內則不渴或飲食二便如常此蒸痘之熱耳熱雖在表而內則無病萬萬不可妄治其有熱之甚者痘毒必甚此不得不為調理若甚於發熱之初必為之表散若甚於見點之後必為之清解錢氏曰熱甚而大小便閉則利之如果有熱

毒實邪則不得驟用補陽等劑致令毒氣壅盛則熱終不退反為害矣

一假熱非熱假寒非寒見有不真誤治則死如文中主溫補仲陽主涼瀉雖若各有所主然無非因病而藥各有所宜是以二者皆不可偏用但得中和斯為貴耳余見近日幼科多不知陳氏之心法但見痘瘡則無論是虛是實開口止知解毒動手只是寒涼百證千家若同一轍豈必盡皆實熱乎如實熱果真自非

涼瀉不可然必內外俱熱方是熱證內外俱實方是實證但其中有似實非實似熱非熱者最多此不可不察之真而審之確也故凡見外證雖若實熱而內察則無如口不甚渴二便通利或見微溏或稟賦素弱或脈息不強或聲色不振或臟氣多陰或飲食不化或脹滿嘔惡或吐衄或倦睡或畏寒或作癢或多驚恐或筋惕肉瞤之輩雖見有熱此皆熱在表而不在此裏總屬無根之火非真熱證也最忌寒涼若執而

妄用則必致敗脾無一免矣

一痘瘡熱甚者毒之盛也其痘必多熱微者毒亦微其痘必少○痘既出而熱不減者痘必日增見點後而熱漸退者痘必疎矣○或有微熱而痘反密者其內熱必甚而或見煩躁或二便熱燥此毒深熱亦深也宜清其內而無解其表○或有熱甚而痘反稀者以外雖熱而內則不熱此毒淺熱亦淺也

一痘瘡初熱治法詳發熱三朝治法條中



一治陽邪實熱之法○表裡挾邪俱熱者柴葛煎連翹  
升麻湯○表熱不解而裡無熱者疎邪飲蘇葛湯柴  
歸飲○表裡俱熱而邪實者雙解散○內熱毒盛者  
東垣涼膈散或解毒防風湯○熱毒熾盛痘瘡紫赤  
煩燥者搜毒煎或大連翹飲或犀角地黄湯○陰虛  
血少燥熱神昏者四物湯或二陰煎○陰虛血熱而  
大便不通者四順清涼飲○大便不通實熱內壅而  
胸膈脹悶者前胡枳殼湯或三黃丸○二便俱不利

而實熱內滯者通關散○小水赤澁而邪熱內蓄者  
導赤散六一散○心火盛而驚搐多痰者萬氏牛黃  
清心丸或七味安神丸○痘瘡稠密身熱毒盛養營  
退熱解毒者鼠粘子湯柴胡麥門冬散

一純陽無陰之證凡發熱譫語狂妄燥亂大渴大煩如  
見鬼祟大便秘結小便赤澁六脉滑數急疾是皆火  
毒內熾之證當用前法酌而治之

陳氏曰凡痘疹壯熱經日不除如無他證只用六味柴

胡麥門冬散治之如不愈服七味白朮散○凡身壯  
熱大便堅實或口舌生瘡咽喉腫痛皆瘡毒未盡也  
用射干鼠粘子湯如不應用七味人參白朮散

程氏曰痘瘡前後凡有燒熱不退並屬血虛血熱只宜  
四物湯按證加減渴加麥門冬犀角汁嗽加瓜蒌霜  
有痰加貝母橘紅切忌人參白朮半夏之屬倘誤用  
之為害不小蓋痘瘡屬陽血多虛耗今但滋陰補血  
其熱自退此即養陰退陽之義也

一痘後餘熱發熱證治俱詳痘後餘毒條中

發熱三朝治款 二十四

痘疹一證雖原於有生之初然必因時氣相觸內外挾邪而後作凡痘之輕重已兆於發熱之微甚而吉凶於此亦可判矣毒輕者易出易靨固不必治毒甚者險證百出故不得不治凡治此者於初熱時急宜用輕揚之劑汗以散之但使外感之邪臟腑之毒皆作穢汗盡從毛竅中出則毒氣已減其半而重者可輕

危者可活矣即如痘中一切變證亦無非毒氣欲出不能之所為一經表散則毒從汗去而諸證亦必自退然又當察表裏之輕重或宜解表或宜清裏或宜托助元氣孰者宜急孰者宜緩有不可執一也故胡氏曰表熱壅盛非微汗則熱不解裏熱壅盛非微利則熱不解失此不治則毒氣漸盛而逆證隨見矣一散表之法當知邪之淺深毒之微甚表邪甚者微散之則表不能解無益於事表邪微者妄汗之則表氣

必虛痘不起發而反為大害故惟以得中為貴亦以微汗為貴不可過傷衛氣也其有大熱不退肌膚秘密或氣令寒凝之時則不得不大為表散一散未應或至於再必令身熱由汗而退則毒氣自解可無患矣此散之微甚有權宜也故凡是痘證最為內外之寒氣務使表裏溫緩但得毛竅中常見津津潤澤亦猶庖人吹籠之法但欲其鬆則皮膚通暢氣無不達痘必易出易收無不善矣

一痘瘡發熱之候宜乍熱乍涼者為常若遍身如火晝夜不休為失常也此當察其表裏酌宜施治

一痘瘡初見發熱若無虛寒等證固不得驟用溫補以助火邪恐致鼓煽痘毒則反資大害若無實火太熱等證切不可因其發熱妄用寒涼必致敗脾泄瀉則為害尤甚此時醫之通弊也大宜戒之

一既經表散之後須謹避風寒若使外邪再感則皮毛閉塞熱毒必將復熾汗而再汗必不能堪又須切戒

生冷水果若誤犯之恐寒濕傷脾而為泄瀉不食則無不致害

一表散之劑凡初見發熱狀類傷寒未知是痘非痘即當先用汗散此時欲散表邪即當兼調營氣宜以柴歸飲為第一惟大便不實者勿用之以其性多潤也其次則蘇葛湯再次則升麻葛根湯或只用加減參蘇飲亦佳○若冬月寒勝之時或氣體壯實表不易解者須加麻黃必要表出一身臭汗為佳但使熱退



身涼苗則輕矣○若初發熱有惡寒身振如瘧之狀者陽氣虛也宜柴葛桂枝湯如黃芪主之痘出即愈一清解之劑用治表裏而無清無散也凡熱之甚者毒必甚若身常有汗而大熱不退或無煩躁熱渴者此其內火薰蒸而表裏俱熱也須兩解之宜連翹升麻湯或如聖湯○若身熱烙手而目赤口乾二便熱秘煩悶不安者此表裏俱實也宜柴胡飲子甚者大連翹飲雙解散或調益元散以利之

一表汗已透者不得再汗恐外亡陽而內傷氣也

一發熱之時有腹痛脹滿者必外邪與毒氣相併未得外達而然宜參蘇飲加砂仁溫而散之

一初熱時有驚搐譫語者是為痘搐微見而隨止者不必治若元氣強壯而搐之甚者宜羌活散調製過硃砂以表之若痰涎壅盛喉內作聲者宜煎生薑湯調化痰丸服之或抱龍丸亦可

一此時渴欲茶水只宜少與葱白湯既可止渴亦可疎

表

一痘瘡首尾皆畏泄瀉宜檢本條速為治之否則內潰  
脫陷之禍不可勝言也

徐氏曰凡解表之藥必在紅點未見之前如熱之甚者  
邪毒必甚宜敗毒散或參蘇飲調三酥餅

張翼之曰凡痘瘡一見紅點便不可用升麻葛根湯恐  
發得表虛也程晨峰曰治痘者不可輕用升麻恐提  
氣上衝引動肺氣也按此二家之說是皆治痘之大

要甚屬有理但其中亦有宜否之辨如陽氣下陷不能透達肌表者則暫用升麻固其所宜又或雖見紅點而表有熱邪未解者則仍宜解散亦不可緩此二說者雖不可堅執實不可不知也

吳東園曰初熱時只有二事惟去邪扶正而已邪熱盛則去邪而正氣自旺正氣衰則扶正而邪熱自退正氣盛而痘自發熱為痘用則不為害矣邪氣退而正氣不受燦血脈充裕則痘自泰矣須於此時看明下

手遲則無濟於事矣

報痘三朝治欵

二十五

痘之形色初見吉凶攸分而寒熱虛實亦已可辨凡調攝挽回之力惟在此時尤為緊要且痘出三日內毒在半表半裏之間關係最重故妄汗則成癰爛妄下則成陷伏寒涼過用必傷正氣燥熱過用則助邪氣虛寒不補則陷伏痒痛實熱不解則變黑歸腎倘有一差死生立判醫者於此不可不為之慎

一痘瘡見點後身熱稍退別無內熱等證或色不甚紅  
頂不甚突者便有虛象雖在三五日内亦切不可用  
寒涼之藥恐傷脾胃為害不小須以保元湯或六物  
煎之類為主因證加減以培養之

一痘瘡必因熱而出因熱而起若熱甚則血燥血枯其  
出反難故於未見點之先必須察其寒熱預為調理  
若有熱證勿得過用辛熱氣分等藥恐助火邪致滋  
多變

一此時最畏泄瀉宜按本條急治之

一見點太早者有吉凶虛實之辨凡發熱一日或纔熱便見必血熱毒盛之所致其證多凶但得痘稀而飲食如常別無他證則亦無害○若其形氣本弱而痘現速者此營熱衛虛不能約束於外故出現太驟須兼實表庶可免痒癩潰爛之患宜實表解毒湯主之○如發熱一日便出而密者其證最凶其毒必甚此證最忌溫補宜搜毒煎加柴胡主之或羌活散加牛

旁子紫草蟬退或調保嬰丹熱甚者調退火丹或雙  
解散急治之可保一二○其有痘雖出早而色不紅  
紫熱不甚者此全屬表虛之證如保元湯六物煎之  
類亦所當用

一痘出不快者有數證須審其有無外感內傷而辨治  
其所病○如冬月嚴寒或非時陰邪外閉寒勝而出  
遲者宜五物煎加生薑麻黃細辛之類主之或五積  
散亦佳○如夏月火熱薰蒸以致血熱氣虛煩渴發



燥而出遲者宜人參白虎湯加木通乾葛主之○有  
因時氣不正為風寒外邪所襲以致皮腠閉密發熱  
無汗而出遲者其證必頭痛鼻塞四體拘急酸痛宜  
疎邪飲參蘇飲惺惺散之類主之○若本無諸邪而  
出不快者此氣血內虛不能驅毒托送而留連於內  
宜十宣散或托裏消毒散○若氣分大虛而出不快  
者宜保元湯六氣煎血分大虛者宜五物煎或六物  
煎加減主之○若內有所傷氣滯而出不快者宜勻

氣散橘皮湯加減主之○頭面出不快當用川芎荆芥羌活防風天麻之類為引使○胸腹出不快當用藁本升麻紫蘇及紫草木通湯○四肢出不快當用桂枝乾葛甘草連鬚紫草蔥白各加生薑為佐連進二服出自快矣

一痘不起發者雖證有不同然率由血氣內虛不能托送者居多此中或宜兼解散或專補元氣當辨而治之○凡出齊之後或被風寒所閉而發熱頭痛陷伏

不起者宜羌活散參蘇飲加內托等藥治之○若紅  
點初出暗昧乾燥不起發者凶宜四物湯加紫草紅  
花丁香蟬退官桂或調無價散量兒大小與之○若  
便實內熱隱隱肌肉間不起發者宜紫草飲子○若  
血分微熱而毒不能達者宜托裏消毒散○若氣虛  
氣陷不起者保元湯或蟬退膏加黃芪○若血虛不  
起者芎歸湯四物湯○若血分虛寒不起者五物煎  
○若氣分虛寒不起者保元湯六氣煎○若氣血俱

虛不起者六物煎托裏散○凡以上補助氣血等劑  
須加好酒人乳糯米更妙○凡發痘之藥用本不同  
有以毒攻毒而發痘者如川山甲人牙蟬酥蟬退之  
屬是也有解毒清毒而發痘者如紫草紅花牛旁子  
犀角木通連翹金銀花之屬是也有升提氣血而發  
痘者如川芎白芷荆芥升麻蔓荆子之屬是也有解  
散寒邪而發痘者如麻黃桂枝柴胡乾葛防風紫蘇  
葱白之屬是也有行氣行滯以通壅塞而發痘者如

丁香木香陳皮厚朴山查大黃之屬是也  
有益火回陽健脾止瀉而發痘者如附子肉桂乾薑肉豆蔻之屬是也  
凡此者孰非托裏起痘之法然但可以此為佐而必以血氣為主則在乎四君四物十全大補之類庶乎隨手而應無不善矣

一虛證見於報痘之時即當速為培補失此不治必不能貫漿結痂十日後必致不救蓋痘瘡實熱者毒盛可畏虛寒者內敗可畏但實熱證顯虛寒證隱人多

誤認故為害反甚且痘瘡之所賴者惟飲食血氣飲食之本在脾胃血氣之本在肝腎但使脾胃氣強則滋灌有力而無內虛陷伏之憂氣血充暢則毒皆生化而無表虛痒痛之患此其在氣在血或微或甚所當早辨而治也○凡痘出灰白不紅綻或灰黑頂陷或身無大熱皮嫩色光溶溶如淫濕之狀或口不渴飲食少腹膨瀉泄二便清涼皆表裏虛寒證也○若氣虛者宜調元湯四君子湯○氣虛微滯者五味異

功散○氣虛宜溫者保元湯六氣煎○脾氣虛寒者  
養中煎溫胃飲或理中湯○血虛者四物湯○血虛  
宜溫者五物煎○氣血俱虛者六物煎五福飲或八  
珍湯○氣血俱虛而寒者十全大補湯○脾腎血氣  
大虛大寒者九味異功煎六味回陽飲○脾胃虛寒  
氣滯者陳氏十二味異功散○凡痘瘡色灰白不起  
發者氣虛也候出齊以保元湯和木通川芎最穩

一火證熱毒在見點之後宜速為清解若不早治則日

甚一日必致不救○凡見點太赤根下皮色通紅此血熱氣有不能管束也後必起發太驟皮嫩易破或痒痛不可救宜急清血分之熱用涼血養營煎或鼠粘子湯或用六味消毒飲加芍藥治之或四味消毒飲益丸散俱佳○凡痘瘡已現毒泄則熱當自解若瘡已出而壯熱不減此毒蘊於內其勢方張其瘡必密宜解其毒用柴葛煎或鼠粘子湯○凡見點之後壯熱不退或三四點相連色紅帶紫或根窠焦色紅



紫成片或口唇熱燥煩渴喜冷舌上有胎或二便燥  
澁此表裏皆熱毒盛之重候急須清熱解毒如表熱  
甚者宜柴葛煎裏熱甚者宜搜毒煎加柴胡或用六  
味消毒飲加酒苓木通梔子黃連山查蟬退歸芍紅  
花之類或調退火丹加減用之○如熱毒內甚而發  
驚狂譫語者宜用紫草煎湯磨犀角汁調硃砂益元  
散或退火丹解之○以上凡解毒之後紅紫退二便  
調能食不渴此表裏皆清也切勿再為解毒須急以

保元湯四物湯六物煎之類調補氣血以助貫漿收  
靨否則恐變痒癩而不能善其後矣○如痘瘡內熱  
之甚大便鞅結不通大渴煩燥腹脹滿脉見洪數而  
痘出不快者此熱毒壅伏於內須通利之以祛其熱  
毒宜柴胡飲子或三黃丸甚則承氣湯或用猪膽導  
之然此惟熱毒在裏痘形未見不得已而微下之可  
也若癍點隱隱見於皮膚中者此已發越在表乃痘  
瘡正發之時切不可妄用下藥○凡痘瘡初出但見

紅點稠密急用纏豆藤燒存性加製過硃砂連進二  
三服或用薄荷牛蒡子煎湯調退火丹服之另用吳  
茱萸為末以水調攤足心引下熱毒亦可解散其勢  
一痘出變黑乃危證也蓋痘瘡賴血氣滋灌血足氣充  
則痘自紅活若熱毒薰燥則成焦黑若陽氣不充則  
成灰黑且黑為水色其虧在腎以陰犯陽最為惡候  
當辨而治之○若熱毒凝聚大便秘結或煩躁熱渴  
而為焦紫黑陷者須通其便先以解裏之急宜柴胡

飲子或當歸丸得利後宜即以紫草飲或加味四聖散以化表之毒仍用胭脂汁以塗之○若大便不結別無大熱等證而痘色黯黑者總由脾虛不能制水故見黑色宜速用五物煎或保元湯加紫草紅花服之外點以四聖丹胭脂汁若漸見紅活則吉若更乾黑則凶○心鑑云凡治黑痘當用保元湯加芎桂補提其氣氣旺則諸毒自散黑者轉黃屢試屢驗

一夾疹夾痧證本非痘中吉兆然亦有輕重之辨宜酌

而治之外有本條仍宜參閱○凡發熱二三日之間  
痘形未見忽然變身發出紅點一層密如蚊蚤所咬  
者決非痘也此乃癍疹之屬多為風寒所遏不能發  
越而癍先見也宜疎邪飲柴葛煎或敗毒散之屬微  
散而解之但得身涼癍必自退再越一日痘出必輕  
矣○凡痘夾癍疹齊出者亦宜辨其寒熱若表裏俱  
熱而邪不解者宜柴葛煎加減主之○若熱邪不甚  
而表邪甚者宜疎邪飲或柴歸飲加羌活防風乾葛

之類主之或敗毒散亦可用○若痘夾紅痧如綿紋者宜涼血化毒湯加柴胡黃芩玄參犀角之屬主之○若痘出夾痧夾疹而眼紅唇裂者表熱也煩躁大渴妄言妄見者裏熱也表裏俱熱最為凶證若不表裏兼治何由得解宜雙解散主之○若加悶亂氣喘者必不治

一賊痘者於出齊之後其中有獨紅獨赤獨大摸之皮軟而不碍手者此賊痘也過三日之外必變成水泡

甚至紫黑泡皆危證也急用保元湯或六氣煎加紫  
草紅花蟬退解之或用燈草木通煎湯調下益元散  
利去心經之熱而紅自退○如已成水泡宜用保元  
湯倍加四苓散利之此秘法也不然則遍身擦破臭  
爛而死

一病於未出之先倘有濕瘡膿水流注者用滑石末敷  
之以防其漏氣或真正綠豆粉亦可

起發三朝治款 二十六

痘瘡放標之後漸漸起脹但肥胖一分是胎毒發出一分胖盡而毒出盡也有不起者或因元氣之弱不能送毒或有雜證阻滯不能升發皆痘前之失調理也此時當速治之否則後難為矣

一痘宜漸發者吉若一齊湧出皮肉虛腫者此表虛不能收攝故奔潰而出後必痒痛或成潰爛急宜人參固肌湯或芎歸湯○若血熱者宜涼血養營煎○虛甚者宜六物煎○毒盛者宜六味消毒飲或四味消



毒飲出入用之

一痘不起發或起而不透者多由元氣內虛不能托送故毒氣留伏不出也毒不盡出則變證莫測凡見此者速當救裏以托其毒然當察其氣分血分辨而治之蓋痘之壯突由乎氣肥澤由乎血氣主响之血主濡之也若形雖壯而色見枯者此氣至而血不榮也宜四物湯加人參麥門冬之類主之○若痘色紅潤而形平陷者此血至而氣不充也宜保元湯或六氣

煎加川芎主之若形色俱弱而不起發者此氣血俱不足也宜六物煎加減主之或保元湯十全大補湯調無價散或獨聖散與之○若冬春之間為寒氣所抑不能起發者宜麻黃甘草湯加歸芪或十宣散主之○若夏秋火盛不起而煩渴秘結內熱者宜人參白虎湯○若痘瘡起脹遲延不紅活者宜保元湯或六物煎加丁香山查糯米人乳好酒主之或用無價散量兒大小以好酒調服○凡痘瘡起發通身皆欲

其透惟四肢稍遠難齊若脾胃素強能食者勿慮惟脾胃素弱食少者四肢多有不透以脾主四肢津液不能灌溉故也宜以補脾為主用快癰越婢湯加當歸或黃芪建中湯加人參防風○若因誤服涼藥而致白癩不起者宜理中湯或胃爰散

一痘雖起發若灰白色或頂陷者氣虛也切不可用寒涼之藥須六氣煎加丁香川芎人乳好酒主○或保元湯倍加酒炒黃芪當歸亦佳

一痘雖起發紅活若頂平色嫩皮薄不能堅厚者此氣虛也必恐變為痒痛宜六氣煎或六物煎加減主之或十全大補湯十宣散俱可擇用

一地紅血散不附者保元湯加芍藥當歸稍以收斂歸附氣位根窠淡紅線暈枯燥者血虛也宜保元湯加當歸川芎酒洗紅花再加山查以行參芪之滯少加木香以行氣而血自汗也

一痘雖起發而乾枯無水或青紫黯色不久必變黑陷

乃血虛之甚也宜四物湯加人參麥門冬紫草紅花  
或調服無價散外用水楊湯浴之兼用胭脂塗法

一痘瘡紅甚而引飲渴不止者名曰燥痘宜犀角地黃  
湯之屬

一痘色紅紫滿頂或掀腫者血熱毒盛也宜涼血養營  
煎加丹皮木通牛蒡子之屬主之然痘出六日以後  
有此證者多死

一痘已出齊而熱尚不退或煩躁發渴引飲或二火司

氣之令可少與冷水數口無妨蓋水性下流不滯上  
膈亦能使毒從小便而出但不可用生果之類恐傷  
脾氣也

一痘瘡貴顆粒分明如彼此相串皮腫肉浮或於本痘  
四旁旋出小痘攢聚胖長漸成一塊此候最險宜用  
快癍湯合六味消毒飲以解其毒

一出齊後痘有小孔自頂直下至脚不白不黑與痘色  
相同者名為蛙痘此因表虛腠理不密而為此證失

之不治則大泄元氣不起不發速人之禍也宜保元  
湯或六氣煎大加糯米川芎丁香提氣灌膿內補其  
孔甚為捷徑連進二三服必孔滿而痘自起若至黑  
色則為疔矣

一口唇為脾之外候人以脾胃為本不宜受傷如初發  
熱即見口唇焦裂此毒氣攻脾乃惡候也宜用瀉黃  
散之類以速解之若不早治則毒聚於唇及衆痘起  
發而唇瘡必已先熟內帶黃漿及諸痘成漿而此瘡

已靨唇皮揭脫漸變嘔惡噎水昏沈不可為矣

灌膿三朝治款 二十七

膿者血之變也痘瘡初出一點血耳漸起漸長則由血成漿由漿成膿始成實矣故有血則有膿無血則無膿也痘至貫膿大勢已成此時必以有膿為主有膿則生無膿則死乃必然之理也故六日以前有熱則宜解毒無熱則宜調養血氣至此自然貫膿若痘至七日以後頂陷不能貫膿者必由先失調治故也所



以治不可緩必俟漿足斯可回生若頂陷灰白漿膿不至此血氣俱離無生意矣

一痘瘡貫膿專以脾胃為主脾胃強則氣血充實膿漿成而飽滿堅厚不須服藥脾胃弱則血氣衰少所以不能周灌故雖見漿而漿亦不滿或清淡灰白不能作膿即所蓄微漿仍是初時之血水而漿薄無以化膿者總屬血氣大虛之候若不速治必成內攻外剝之證宜急用六物煎或六氣煎加減治之或保元湯

或十全大補湯加人乳好酒與服亦妙○欲辨脾胃  
強弱當於飲食二便察之飲食雖少而大便堅者脾  
胃之氣猶可也但微加調補以能食為貴若大便不  
實或見溏瀉則最為可畏蓋一瀉則漿停瀉止則貫  
滿矣速宜用溫胃飲甚者用陳氏十二味異功散主  
之○如痘當作膿之時猶是空殼此血不附氣也血  
既不至則毒何由化宜五物煎或四物湯或紫草散  
加蟬退主之○如頂陷膿少或服內托藥而暫起復

陷者血氣大虛故也宜十全大補湯倍加參芪當歸  
糯米煎成人乳好酒服之此助灌之妙法也

一貫膿三朝之內若身涼而痘色灰白或不進飲食或  
寒氣逆上而為嘔吐或腹脹或泄瀉而手足逆冷此  
皆純陰無陽之證也急宜用保元湯加二仙散連進  
數服甚者必須九味異功煎或陳氏十二味異功散  
皆可擇用○若寒戰咬牙泄瀉等證俱同此治

一手足灌膿飽滿者方見脾胃之強氣血之足也若色

見灰白漿水清薄或鼈痛不起者此必脾胃之弱也  
或灌漿已完而四肢猶有不灌者恐終變痒痛之證  
宜快癰越婢湯或六氣煎加防風白芷以達之庶無  
陷伏之患若毒有未透亦恐關節之處歷後致生癰  
毒

一痒痛不止者雖曰氣血俱虛然亦由火力不足故不  
作痛而作痒○宜六氣煎或五物煎加防風白芷木  
香蟬退主之○心鑑曰氣愈虛則愈痒當用保元湯

倍加黃芪以助表少加芍藥以制血其痒自止○若將  
靨發痒此毒退血活新肉和暢自然之理也不必治  
之

一貫膿痛楚不止者氣滯也少下保元湯加山查木香  
以行滯氣如膿色盛滿大下四苓散利之而痛自止  
一痘瘡起發之後不作膿者有四證○有內虛而不灌  
者專宜托補氣血治法如前○有感風寒邪居膚腠  
而不灌者宜溫散之以柴葛桂枝湯加黃芪白芷

有熱毒熾盛身壯熱津液乾涸小便赤熱而不灌者  
宜托裏解毒利小便以紫草飲子或用辰砂六一散  
解之俟熱退後方可用保元湯熱甚者大連翹飲○  
若大便堅熱數日不通而不灌者宜豬胆導之使氣  
得疏通則營衛和暢不然恐成黑陷也○有觸穢氣  
而不灌者外宜薰解用胡妥酒或辟邪丹內服紫草  
木香湯或紫草快癍湯

程氏曰凡頂陷無膿者為逆但得根窠紅潤血猶不散

急用保元湯和芎歸白芍丁香糯米煎熟加入乳好酒溫服○若色白如水晶內無膿者治亦同但得膿痘相間者猶可治若純是水晶色者決死○若地紅血散有熱者去丁香加白芍地骨皮以歛血退熱○若寒戰咬牙宜以木香散異功散選用

程氏曰凡正壯之時有痘雖起壯而皮膚無力按之水漿就出雖肉色不暗此乃名為假壯至十一二日決不能回漿結靨內攻而死可急用保元湯加丁香川

芎藭米提氣灌膿自愈此即名內托也凡內托之法即保元湯加川芎丁香便是不必千金內托也但按本方佐使用之

一痘將灌膿之時忽面上有乾靨者即倒陷證也宜速用八珍湯或六物煎加金銀花牛蒡子連翹麻黃之屬水煎熟調獨聖散服之○服藥後若乾者復起灌膿未乾者即壯而飽滿或空地處再出補空小痘者上也○若痘不作膿空處或發癰毒者次也○若連



進三服而乾者不腫未乾者不飽補痘不多則最險證也宜以十全大補湯加金銀花調治之

一灌膿時發白泡如彈子者用棗針刺去其水外以滑石末敷之內服保元湯加石榴皮茯苓以利皮膚之水○如發紫泡乃毒溢皮膚之上也此證必危

一瘡爛成片膿水不乾者用滑石末敷之或敗草散敷之加珍珠尤妙

一痘瘡有重出者凡痘瘡破損潰爛處但得復腫復灌

不致乾枯或於原無痘處復出一層如初出之狀亦以漸起發灌膿者此皆餘毒未盡賴裏氣充實毒不得入故猶出於表而不成倒陷是皆逆中之順證也但痘瘡重出一番必其人能食而大便堅乃足以勝其再作之毒自無足慮也如食少而大便潤者宜用十全大補湯之類補而調之若自利者宜陳氏十二味異功散肉豆蔻丸主之蓋病久氣虛惟利溫補不可再解毒也

結靨三朝治款 二八

痘瘡灌膿之後肥澤堅實以手摸之瘡頭硬而微焦此欲靨也靨時乾淨無突陷淫濕破綻色蒼蠟皮堅厚外明內暗尖利碍指者此為正靨若痘雖似乾而痂薄如紙或有內證未除此痘之極險時也急宜調補庶不致害

一痘瘡自出起至十日十一二日當從口唇頭面以漸收靨但自上而下者為順自下而上者為逆察有他

證速宜治之

一將收靨時而一向身溫忽然發熱者名為乾漿是亦常候此時不可輕用汗下若有風寒外感及飲食所傷乃當隨證治之

一痘瘡收靨太遲或當靨不靨者證有數種當詳辨治之○大都當靨不靨之證惟脾胃弱中氣虛者居多蓋中氣虛則不能營養肌肉使之成實亦或致潰爛也但察其別無他證而形色氣血俱虛者宜內用十

全大補湯外用敗草散襯之○若當靨不靨微熱脉大而別無他證者此陰分之不足也宜四物湯倍加芍藥何首烏○若血虛熱毒未清者宜四物湯加牛蒡子木通山查○若因食少脾胃氣虛而不收者宜六氣煎或六物煎加減主之○若頻見泄瀉脾胃弱肌肉虛或腹脹煩渴而不收者宜陳氏十二味異功散或木香散外用敗草散發之○若當靨不靨之際忽見頭面溫足指冷身不熱或泄瀉腹脹氣促煩渴

急與陳氏十二味異功散或九味異功煎否則不救  
○凡痘瘡將靨之時而見泄瀉煩渴腹脹咬牙等證  
多有難救若與蜜水生冷等物必煩躁轉加而死○  
有因飲水過多或觸於濕氣以致脾胃肌肉濕淫不  
收難靨者宜五苓散或四苓散加山查利之○有因  
熱毒未退膚腠鬱蒸陰不能斂而當靨不靨者若不  
速解則毒必內攻為害不淺宜犀角散加芍藥牛蒡  
子○有內外俱熱陽毒散漫以致大便秘結陰氣不

行而當靨不靨者宜內用四順清涼飲或三黃丸以  
通其便外用敗草散豬胆導法○有天寒失於蓋覆  
瘡受寒凝而不收者宜服五積散外用乳香或芸香  
於被內薰之○有天熱過煖痘被熱蒸不收者宜內  
服人參白虎湯或五苓散四苓散以利濕熱外用天  
水散撲之○有為邪穢陰寒所觸致傷元氣而不靨  
者宜保元湯或十二味異功散外以辟邪丹薰之豬  
髓膏塗之即愈

一痘瘡內熱毒邪未盡化而乾靨太疾者後必為目疾  
或為癰毒及諸怪證宜涼血養營煎少清其火若大  
便過於乾結者宜微利之以解其毒當歸丸主之

一痘瘡有膿結靨則為善無膿結靨則為凶此治之不  
可緩也若痘已膿成不能結靨而致潰爛或和皮  
脫去者此名倒靨乃毒氣入內也急須大補中氣以  
托其裏宜六氣煎倍加芍藥及紫草防風白芷主之  
若兼濕熱者宜六氣煎加芍藥合四苓散主之○如



頭面瘡破服補藥後但得復腫復灌或遍身無瘡處  
又出一層謂之補空雖過期延日而飲食不減不為  
大害若服藥後不起不補此毒已入深最凶候也

一痘瘡無論已潰未潰於十二日之後但得結靨便為  
佳兆若痂皮不結則必成倒靨其有回之未盡或遍  
身俱靨而但有數顆不靨者終致作痒抓破亦難必  
其生也速宜治之

一靨時色白如梅花片者此為假回十二日後當死此

不治之證也。如不泄瀉，可速用六氣煎，或六物煎，合二仙散，大進救之。

一痘瘡成膿，不靨，以致潰爛，膿汁淋漓，粘着疼痛，不可着蓆者，用敗草散，或蕎麥散，以絹袋盛撲之，更多布蓆上，襯卧尤佳。或用秘傳茶葉方亦佳。○若欲面上不成癍者，用救苦癍散，以蜜水調敷之。

一痘瘡潰爛，先傷於面者，凶兆也。如飲食無阻，二便如常，更無他證者，宜內用十全大補湯。○如毒盛內熱。

者宜以解毒防風湯加當歸蟬退相間服之外以救  
苦滅癩散敷之

一痘瘡於未貫之先或曾傷犯破爛成瘡及諸痘收靨  
此獨不靨膿汁不乾更多痛楚若不急治漸成疔蝕  
損傷筋骨以致橫天宜服十全大補湯外敷救苦滅  
癩散或白龍散

一痘瘡抓破去皮而猶有血水者急用六氣煎或六物  
煎主之以白龍散敷之

一痘有臭氣凡當收靨之時臭而帶腥者此痘瘡成熟之氣邪氣自內而出也為吉○若臭如爛肉濁惡不可近者此雖似結痂未可為真急須清熱滋血宜涼血養營煎或解毒防風湯○若於養漿之時便見臭者此毒火薰蒸之氣積於中而見於外也大凶速宜清熱以解其毒○若痘瘡潰爛不靨而臭不可聞者名為爛痘間亦有收靨無事者只要胃氣不衰飲食如故不作煩躁則為可治宜用八珍湯或四味消毒

飲外用敗草散敷之

一痘瘡靨後而有生瘡潰爛成坑者須用托裏消毒散或解毒內托散主之如氣血俱虛而不斂者必用十全大補湯○如遍身瘡多潰爛深而無氣血者必死

靨後落痂治欵 二九

痘瘡結痂自當依期脫落其有應落不落及延綿日久之者此亦不可不察而治之以防他變也

一結痂至半月一月粘肉不落或發痒者此必表散太

過傷其津液以致腠理虛澁無力脫卸故也宜用人參固肌湯或以真酥油麻油潤之○如久而不脫宜六物煎加黃芪肉桂蟬退主之切不可勉強剝去恐傷皮膚一時難愈

一 遍身結痂雖完若餘熱未退蘊蓄肌表或身熱或煩渴而痂不落者宜涼血養營煎或解毒防風湯酌宜用之○如熱甚者宜大連翹飲加地骨皮主之○外宜用滑石為末以蜂蜜調勻雞翎掃潤痂上即落

一痘癥突起作痒不止者此熱毒未盡也宜解毒防風湯主之

一痘癥發痒剥去痂皮或血出或復成膿如瘡疥者此血熱氣虛也宜四君子湯或四物湯加紅花紫草牛旁子治之

一收靨遲而痂不落昏昏欲睡此邪氣已退正氣未復脾胃虛弱也宜五福飲或調元湯緩緩調治之若餘火未清者宜酸棗仁湯

一痘痂既落中氣暴虛多有不能食者宜五味異功散  
或養中煎以調之

一收靨落痂之後若餘熱不退譫語昏沈者用辰砂六  
一散以小柴胡湯調服之若大便秘脹者宜當歸丸  
利之熱甚者用大連翹飲最妙

一原痘不灌膿乾如豆殼雖痂落而疤白或有餘熱不  
退者雖過一日亦要死宜速用八珍十全之類調補  
之○或毒盛者仍須先用消毒散



一痘痂既落之後血氣未復極當調護切不宜澡浴及  
食飲生冷傷饑過飽損傷臟氣致生他病為終身之  
患也慎之慎之

痘後餘毒發熱

三十

瘡痘無論疎密只要毒出得盡而無留伏其發以漸而  
透其收以期而淨豈尚有餘毒哉若出不能盡發不  
能透收不能齊其人自有餘熱或渴而腹痛吐瀉或  
小便赤澁大便秘結精神昏憤四體倦怠飲食減少

坐卧不安是皆餘毒未淨之證凡出之淨者作三四次出大小不一至成漿收靨之時於瘡空中猶有補出者此皆出之盡也若只始出一層後無補空之痘此必尚有伏也又發之透者必於手足候之蓋手足部遠氣不易達若能充拓飽滿漿氣頗足可謂發之透也若只平癩不能成膿此毒雖出而未能旁達四肢必有留而伏者又收之齊者自面而下痂皮潔淨中無潰爛可謂之齊若收之太早或不成痂此必有

內陷之毒也凡若此者皆有餘毒須察部位經絡寒熱虛實或補或利或解或散以平為期若治之不應不已者此壞證也不必妄行攻擊

一痘後發熱不減者此有虛實二證如能食而煩渴小便赤大便秘者實也宜四順清涼飲三黃丸之類主之○若痘後餘毒未淨有諸熱證者惟大連翹飲為最佳○如大便不秘小便不赤坐卧振搖飲食少進者虛也宜調元湯或五福飲加芍藥之類主之

心鑑云痘後餘熱者虛熱也虛熱多發於午後臉赤唇紅或妄言譫語切不可作實熱治當用調元湯或保元湯加黃連熱甚者宜大連翹飲若妄用攻下使胃氣一虛則變生他患致成壞證不可治矣

徐氏曰痘後餘熱不除者當量其輕重而治之大熱則利小便小熱則宜解毒蓋利其小便使心火有所導引雖不用涼藥而餘熱自無容留矣小熱宜解毒者蓋小熱不解恐大熱漸至矣利水者宜導赤散解毒

者宜犀角地黃湯○若但身表發熱而別無他證者  
止宜柴胡麥門冬散

禁忌 三一

一痘瘡起發之初全要避風寒遠人物節飲食守禁忌  
若到養漿之時尤宜謹慎如天氣大熱則撤去衣被  
當令清涼但謹門窗帷帳勿使邪風透入如天寒則  
宜厚添蓋護房中勿絕燈火如或作痒須為撫摩勿  
使搔破以致難貫最當慎也

一痘瘡房中凡諸臭穢腥香之氣及僧道師巫之人或罵詈呼怒震驚歌樂掃地對面搔癢對面梳頭之類皆不可不避

一房中欲辟臭穢惟燒辟邪丹或紅乾棗或黃熟香皆佳若蒼朮之氣則太峻也

一飲食最宜調和無使太過不及或好食何物有不宜者但少與之以順其意若禁固太嚴使之忿怒恐反助火邪但不可縱耳至若助火生風及葱蒜泄氣等

物皆所當慎

一痘瘡前後大忌猪肉魚酒之類恐惹終身痰欬

一痘瘡平復之後勿與雞鴨蛋食之則傷神

一痘疹退後須避風寒戒水濕如犯其邪則終身欬嗽

患瘡無有休日

東垣曰痘瘡宜避一切穢惡氣及外人入房遠行勞汗

氣腋下狐臭氣房中淫液氣射香臊羶氣婦人經候

諸血腥臭氣硫黃蚊烟氣廁缸便桶氣誤燒頭髮氣

吹滅燈燭氣雞毛魚骨氣葱蒜韭薤氣已上皆不可  
犯須要時常燒乳香之類甘香之氣使之漸聞則營  
衛氣暢可無倒靨陷伏等患

陳氏曰凡痘疹熱渴切不可與瓜柿蜜水等冷物及清  
涼飲消毒散等藥恐損脾胃則腹脹喘悶寒戰咬牙  
而難治○輕變重者犯房室不忌口先曾瀉飲冷水  
餌涼藥也重變輕者避風寒常和煖大便稠也

薛氏曰前證若兼吐瀉手足指冷屬內虛寒而外假熱



也最忌寒涼若大便不通渴欲飲水則蜜水之類又當用也但當審其熱之虛實可也今北方出痘多有用水無不愈者蓋北方多睡熱坑故也

出不快 三二

陳氏曰凡痘瘡出不快者多屬於虛若誤謂實熱壅盛妄用宣利之藥致臟腑受冷營衛澁滯不能運達肌膚則不能起發充滿亦不能結實成痂後必痒癩煩躁喘渴而死

薛氏曰前證亦有各經熱盛壅遏而出不快者亦有甚  
甚痘疔而不能起發者亦有餘毒而潰痒者當細審  
其因而藥之

景岳曰按此二子之說皆為有理但此出遲不起之證  
總是氣血內虛不能速達者為最多若風寒外閉及  
痘疔留毒而不出不起者雖亦有之但不多耳再若  
各經熱盛而壅遏不出者則尤為最少何也蓋熱盛  
者毒必盛毒盛者勢必疾速而或密或早無能緩也

故凡治此者必當察其熱之微甚以辨虛實再察外邪之有無以辨表裏如無外邪亦無痘疔而火邪不甚者則盡屬虛證宜從溫補不得雜亂以遺後患也諸治法詳報痘三朝治款中

陷伏 三三

凡看痘之法其出欲盡出不盡者伏也其發欲透發不透者倒陷也其收欲淨收不淨者倒靨也伏惟一證陷有數種凡毒之伏者患在未壯之先其人瘡雖出

而熱不少減或煩渴或躁悶此必有伏毒未得全出也陷則患於既壯之後其血漸乾而變黑者謂之黑陷漿膿未成而為痒癢或破損者謂之倒陷漿膿既成而復濕爛皮破不肯結靨收不乾淨者謂之倒靨亦陷類也是皆惡候凡治此者使非猛峻之劑安能望其回生時醫欲以尋常之藥救此危病其猶放雀搏鷓驅羊敵虎耳故其輕者宜奪命丹重者宜神應奪命丹則其庶幾耳倘服藥後而反增黑色者為必

不治之證

一痘之留伏毒不盡出者證有不同當辨治之○有元氣不足而托送無力者此必稟賦素弱飲食素少身無大熱而出有不透即不足之證也宜十宣散蟬退膏之類加獨聖散主之○若虛而有熱者宜人參透肌散○有毒盛氣滯留伏經絡而出不透者必其人氣體厚濁身有大熱而汗不易出即皆有餘之證宜判防敗毒散主之○若表裏俱實外有大熱內有秘

結煩滿而留伏不透者宜雙解散

一乾黑不起而倒陷者當分五證○一則內虛而陽氣不能外達故致出而復沒或癍點白色或見灰黑倒陷者必其人不能乳食或腹脹內寒或手足冷或吐瀉或寒戰咬牙皆內虛也速宜溫中輕則十宣散六氣煎甚則陳氏十二味異功散或九味異功煎外用胡荽酒噴之或更用十全大補湯但得冷者煖陷者起黑者紅活便是佳兆若服藥後而反加煩躁昏亂

者死○二則毒氣太盛內外薰灼不能盡達於表因而復陷於裏乃致熱煩躁擾氣喘妄言或大小便利渴而腹脹是皆毒氣之倒陷也輕則利小便宜大連翹飲通關散或四順清涼飲甚者通大便宜承氣湯並外用水楊湯浴之得利後瘡出則佳更用加味四聖散調治之凡治此者但得陽氣不敗脾胃溫暖身溫欲飲水者生若加寒戰身冷汗出耳尻反熱者死○三則外感風寒肌竅閉塞血脈不行必身痛或

四肢微厥癍點不長或變紫黑如癰疹者此陷伏也  
宜溫肌散表用桂枝葛根湯如麻黃蟬退或紫草飲  
外用胡荽酒噴之但令溫散寒邪使熱氣得行則痘  
自長矣○四則或因誤下毒氣入裏而黑陷者先宜  
六氣煎或溫胃飲以培養胃氣如表有未解者後宜  
柴葛桂枝湯以疎散於外甚者再加麻黃○五則以  
房室不潔或為穢惡所觸而黑陷者宜內服紫草飲  
子外用胡荽酒噴之或用茵陳薰法并用辟邪丹



一將起發時雖有漿水但色見黑黠者最為可畏急宜  
六氣煎加川芎以養血氣血氣旺則毒自散而色自  
活矣或以十全大補湯合無價散主之

一凡倒靨之證亦須看大便何如若大便秘結而內熱  
者宜利之以四順清涼飲或三黃丸主之○若大便  
不實而內不熱者宜補之以六氣煎或十全大補湯  
加防風白芷甚而泄瀉者宜陳氏十二味異功散

有雖不泄瀉而虛寒甚者宜九味異功煎並外用敗

草散

一治陷伏證有三驗法凡服藥之後但得陷者復腫漸以成膿乃一驗也若原瘡已乾而別於空處另出一層起發成膿漸以收靨者二驗也亦有不腫不出只變自利下去膿血而飲食精神如故者三驗也有三驗者吉無則凶

痒癩拆破

三四

訣云虛則痒實則痛又曰諸痒為虛此固其辨矣然實

即無熱也虛即無寒也蓋如瘡瘍之痛必由乎熱今  
不作痛而作痒此其無熱可知無熱由乎陽虛陽虛  
便是寒證諸有以初起作痒為火者皆謬也且凡痘  
瘡發痒則多為不起不灌而痛陷繼之最可慮也故  
凡治痒之法雖云當補然尤不可不溫惟溫補則營  
衛和氣血行而痘自起矣痘毒既起而透則多有作  
痛尚何痒哉故痘於起發之時則宜痛不宜痒也然  
痒有數證亦當辨治如左

一痘瘡初見點便作痒者此邪在半表半裏之間而進  
退遲疑總由元陽無力欲達不能也速當溫補陽氣  
兼以疎散但使腠理通暢則痘自起而痒自止矣宜  
六氣煎加川芎白芷防風荆芥之屬○若虛在血分  
而色白者宜六物煎或五物煎加減主之

一痘瘡出齊之後但是作痒俱宜保元湯或六氣煎加  
川芎當歸防風荆芥治之或用十全大補湯或用蟬  
退膏

一血滲肌膚鹹蜚皮肉而作痒者亦以氣虛而然宜保元湯加芍藥當歸以制血或加丁香以治裏官桂以治表表裏俱實自不作痒

程氏曰凡前後痒痛宜保元湯加何首烏牛蒡子白芍藥何首烏須赤白兼用

一痘瘡乾而作痒者宜養血潤燥以五物煎加防風荆芥外用茵陳薰法

一痘瘡濕而作痒者宜補氣去濕以四君子湯加防風

荆芥桂枝以解之外用茵陳薰法

一頭面為諸陽之會若痒而抓破則泄氣最甚速宜六氣煎或十全大補湯加防風荆芥何首烏之屬以培補之但得復腫復灌而飲食如常則無害若痒不止而滿面抓破者必死

一遍身發痒抓破膿血淋漓者宜參芪內托散倍加當歸及白芷荆芥木香使氣和血行其痒自止外以敗草散敷之

一瘡痒潰爛粘衣連席難任者內服十全大補湯加防  
風荆芥外用敗草散

一痘瘡見形而皮肉紅艷起發而皮嫩多水者其後多  
致痒痛也急須先期調補之

一痘瘡將收而痒者其膿已成其瘡已回邪散而正復  
營衛和暢故痒也不須服藥但謹護之勿令拆破以  
致損傷成瘡

一漿膿初化膿未成而混身瘙痒不寧者此惡候也速

當溫補氣血用六氣煎六物煎之類加以防風白芷  
荊芥之屬必令痒去方保無虞若痒甚不休瘡壞皮  
脫其毒復陷謂之痒痛必不能活矣

活幼心書云凡作痒不止用荊芥穗以紙束之用刺痒  
處以散鬱邪其痒自止此屢驗之法內服消風化毒  
湯加參歸以解之

作痛 三五

痘瘡作痛有實有虛雖曰諸痛為實然此言亦不可執



若身有大熱而大便秘結煩躁不寧喘脹作渴而為痛者此實痛也若無大熱而二便清利脾氣不健衛氣不充營失所養而作痛者此虛痛也實者宜解毒清火當用解毒湯或四味消毒飲之類主之虛者宜補養血氣當用保元湯或六物煎之類主之

頭面腫 三六

經曰熱勝則腫大抵毒盛者必腫毒微者不腫故亦可以腫與不腫察毒之甚與不甚也然疔瘡應期起發

毒必以漸盡出故頭面亦必以漸浮腫此毒火聚於  
三陽之分欲化膿漿其宜然也然止宜微腫而甚腫  
者大非所宜○若當起發之時頭面全然不腫必其  
痘稀磊落毒氣輕淺者然此最吉兆也

一痘以漸起面以漸腫及灌膿收靨而腫以漸消此常  
候也如應腫不腫者必其元氣不足應消不消者必  
其毒氣有餘須急治之

一有痘未起發而頭面預腫皮光色嫩如瓠瓜之狀此

惡毒上衝之候也。又有痘點已見，但隱隱於皮膚之中，肉日腫而痘不起者，決死。○汪氏理辨曰：痘起五六日之際，有面目先腫而光亮者，是陽乘陰分毒不能發也；何也？血乃氣之本氣，乃血之標，血有不足，則根本之力已虧，故致虛陽動作，其氣妄行，肉分區區不足之血，何能載毒而出？七日之後，傳經已足，則氣退毒陷，陰陽各失其正，尚何可治之？有凡值此者，不可不預調氣血，若待臨期無能為矣。

一痘正起發頭面腫脹時正面之瘡切防瘙痒不可使之抓破少有損傷以致真氣外泄邪氣內蝕則腫消毒陷多致死矣但得破者復灌消者復腫飲食二便如常則變凶為吉矣宜十全大補湯或合苦參丸治之

一頭面腫脹而眼目咽喉痛閉者急宜解毒眼與咽喉相兼治之宜消毒化癍湯去升麻或大連翹飲主之一無疫毒之氣而頭項顛頷預腫者此必大頭風及蝦

蠟瘟之屬宜以疫氣治之如大連翹飲及普濟消毒  
飲之類主之但無此者亦多凶少吉也

痘疔黑陷 三七

痘有紫黑枯硬而獨大針撥不動手捻有核者是為痘  
疔若不去之則一身之痘皆不能起發或皆變黑色  
必致死矣其有黑大而軟者此名黑痘慎不可作痘  
疔治也

痘疔者以熱毒蓄積氣血凝敗而成也然其類亦有數

種最為惡候宜謹察之○有初出紅點漸變黑色其  
硬如石者此肌肉已敗氣血中虛不能化毒反致陷  
伏也○有肌肉微腫狀如推粟不分顆粒者此氣滯  
血凝毒氣結聚不散也○有中心黑陷四畔突起戴  
漿者此血隨毒走氣不能充也○有中心戴漿自破  
潰爛者此氣血俱虛皮膚敗壞也○有為水泡溶溶  
易破者此脾虛不能制濕氣虛不能約束也○有為  
血泡色紫易破者此血熱妄行而氣虛不能完固也

○有瘡頭針孔漿水自出者此衛氣已敗其液外脫也○以上數證雖與痘疔不同而危險無異但於五六日間候之若見一證多不可治

一凡痘疔及黑陷者宜內服六氣煎加川芎紫草紅花木通之類以補血涼血而疔自退疔退後宜大進六氣煎或六物煎外用四聖丹以胭脂汁調點之○疔若大者用銀針挑破瘡口吸出惡血入後藥未即轉紅活大抵黑陷而疔多或餘毒不起者多死○若痘

疔挑去黑血搽藥不變仍是黑色者必死

心鑑曰痘疔見於四肢不近臟腑者易治若穿筋骨者亦難治但有見於頭面腹背逼近於內者其勢必攻穿臟腑矣如未穿者急須治之用飛過雄黃以真蟬酥拌勻為丸如麻子大挑疔點入立效又或用色豆一粒去皮膜合硃砂一分研爛點入一時突出即愈

內服無價散汲井水加豬尾血三五點調下

一痘瘡黑陷者必氣不足血不活也急宜托裏散或六



物煎加川芎肉桂紅花蟬退調無價散或獨聖散甚  
者宜九味異功煎或十全大補湯調無價散仍外用  
四聖丹點之○若見焦紫而黑混身皆是及身有大  
熱或大便秘結內熱煩渴者此亦有火毒之證宜四  
順清涼飲或承氣湯合萬氏奪命丹以解其毒俟火  
邪畧退即宜用六氣煎調無價散以托其內亦可望  
其生也

一痘瘡起發之時但見乾燥其根焦黑即當速治之如

火邪不甚證無大熱者惟五物煎或六物煎為最宜也如有火證火脉血熱毒盛而焦黑者輕則涼血養營煎或鼠粘子湯甚則以萬氏奪命丹合而服之

一原有瘡疥未愈至痘出之時其破處痘有攢聚而形色黑潰者急以銀針挑破吮去毒血吐於水中其血紅者可治黑者難治須內服加味四聖散或萬氏奪命丹外用萬氏四聖散塗之

一靨後痘疔潰爛成坑內見筋骨者宜托裏消毒散或

荆防敗毒散加川山甲蟬退殭蠶外用神效當歸膏  
太乙膏貼之或以白龍散敷之

飲食 三八

痘瘡終始皆以脾胃為主但能飲食則氣血充實而凡  
起發灌漿收靨無不賴之故能食者雖痘瘡稠密亦  
自無害不能食者雖痘瘡稀少亦為可虞此脾胃之  
調所當先也然證有不同最須詳審施治

一痘有毒氣正盛而不食者當痘瘡正出之時雖不欲

食但得痘色真正不為害也蓋熱毒未解於將出未出之際多有不欲食者待毒氣盡出自能食矣其有痘已盡出而仍不欲食者當徐用四物湯加神曲砂仁陳皮一二劑必能食矣

一痘見灰白別無大熱停滯等證而食少或不食者必脾胃虛也宜五味異功散或四君子湯○若胃中陽氣不足不能運化而食少者此虛而且寒也宜溫胃飲養中煎或六氣煎主之

一凡命門元陽不足則中焦胃氣不煖故多痞滿不食  
下焦腎氣不化故多二陰不調此必用理陰煎加減  
治之自見神效勿謂小兒無陰虛證也

一凡泄瀉或見惡心或嘔吐而不食者尤屬胃氣虛寒  
也輕則理中湯六氣煎甚則陳氏十二味異功散或  
用六氣煎合二仙散主之

一凡脾氣不虛但胃口寒滯或痛或嘔而不食者宜益  
黃散

一凡停食多食而不食者宜大小和中飲以清宿滯或  
五味異功散加山查麥牙神曲砂仁或合勻氣散治  
之

一凡口瘡不能進食或咽喉疼痛而不能食者但清其  
咽痛止自食矣宜甘桔湯或加味甘桔湯

一凡外感風寒邪入胃口則不能食須表散寒邪邪散  
自能食矣宜加減參蘇飲或柴陳煎或五味異功散  
加柴胡

一痘後別無他證而飲食不進者此惟脾氣不足宜五味異功散或溫胃飲養中煎之類主之

程氏曰凡水穀不能運化而飲食不進者只用保元湯加陳皮麥芽神曲砂仁扁豆生薑嘔者加真藿香

徐氏曰痘瘡不乳食者有虛實二證或吐或利面目青白或青黑色者為虛寒宜溫之補之若大小二便乾澁面赤而氣壅或渴或熱或目睛黃赤氣粗中滿者為實熱宜清之利之

咽喉口齒 三九

咽喉司呼吸之升降乃一身之橐籥也毒氣不能舒散則壅聚於此腫痛閉塞水漿難入則死生係之深可畏也首尾俱宜甘桔湯加麥門冬牛旁子玄參杏仁或加味甘桔湯及拔萃甘桔湯俱可用○熱甚痛甚者宜東垣涼膈散加牛旁子或以甘桔湯合黃連解毒湯加石膏木通牛旁子山豆根射干並外用玉鑰匙點之○咽痛便秘者宜四順清涼飲下之○以上



證治必其能食肉熱者方可用此寒涼之劑若上焦雖熱而下焦不熱或不喜飲食者只用加味甘桔湯徐徐嚥服不必用牛旁子恐其性涼傷脾也

一咽喉腫痛凡痘瘡多有是證但七日前見者為逆七日後見者無慮蓋起發灌膿之時內外之痘俱大以致氣道壅腫而然此痘也非喉痺之毒也待外痘既靨則內證自除矣不必治之

徐氏曰凡咽喉腫痛不能飲食者內服加味甘桔湯外

看身上有痘之最大者此其毒氣相連宜用香油燈  
草燃而焯之一焯即愈或用手捻破以痘疔散塗之  
陳氏曰凡身壯熱大便堅實或口舌生瘡咽喉腫痛皆  
瘡毒未盡宜用四味射干鼠粘子湯如不應宜七味  
白朮散

一痘瘡弄舌吐舌者脾之熱也輕者導赤散甚者瀉黃  
散

一唇口與五內相通故熱毒內發口舌必先受傷毒甚

則口舌或紫或白或黑舌或腫大此皆實熱之證宜  
內服黃連解毒湯加石膏牛蒡子木通生地或東垣  
涼膈散若大便乾結者宜局方涼膈散外用玉鑰匙  
點之若口舌生疔者以吹口丹或陰陽散敷之

一牙根腫爛成疔者此陽明熱毒內攻也殺人甚速宜  
甘露飲主之外用老茶葉韭菜根煎濃湯洗之仍用  
翎毛刷去腐肉洗見鮮血乃以神授丹或搽牙散敷  
之日三次或綿壘散亦可○若爛至喉中者用小竹

管將綿壘散吹入雖遍口牙齒爛落口唇穿破者皆可敷藥而愈然必有黃白膿水者方可治若色如乾醬其肉臭爛日爛一分者俱不治

一牙疳臭爛氣粗熱甚舌白至唇口臭如爛肉大便瀉膿血肚腹脹痛此胃虛毒氣內攻胃爛之證若山根發紅點者此疳毒內攻故見於山根亦胃爛之證俱不治

一痘疹退後若有牙齦腐爛鼻血橫流者並為失血之

證宜局方犀角地黄湯加山梔木通玄參黃芩之類  
以利小便使熱毒下行外用神授丹治之不可緩也  
若疔瘡色白者為胃爛此不治之證

痘瘡中論列方 四十

保元湯

一 痘

調元湯

二 痘

五味異功散

四 補

四君子湯

一 補

五福飲

六 新補

九味異功煎

二 新因

四物湯

八 補

五物煎

三 新因

十二味異功散 痘二

二陰煎 新補十

六物煎 新因二十

十一味木香散 痘二

二仙散 痘二十

六氣煎

十全大補湯 補二十

十宣散 痘十

八珍湯 補十九

六味回陽飲 新熱二

溫胃飲 新熱五

理中湯 熱一

七味白朮散 小七

養中煎 新熱四

理陰煎 新熱三

七味安神丸 小七三

益黃散

九和十

胃愛散

九痘十

黃芪建中湯

七補二

芎歸湯

五痘十

托裏散

四痘

參芪內托散

七痘

惺惺散

三小二

酸棗仁湯

五補八

人參固肌湯

二痘十

柴陳煎

九新散

柴葛煎

十八新因

人參透肌散

三痘十

柴歸飲

十五新因

蘇葛湯

七痘二

升麻葛根湯

六痘二

疎邪飲

十六新因

小柴胡湯

散九

柴葛桂枝湯

散六

參蘇飲

散四

柴胡飲子

散二

加減參蘇飲

散四

五積散

散九

五柴胡飲

散五

桂枝葛根湯

散七

雙解散

散一

羌活散

散八

麻黃甘草湯

散五

益元散

散十二

搜毒煎

散十九

柴胡麥門冬散

散四

天水散

散十二

敗毒散

散又三



荆防敗毒散 痘三

六一散 寒百

解毒湯 痘五

黃連解毒湯 寒一

甘露飲 寒十

消毒散 痘四

托裏消毒散 痘六

五苓散 和一

瀉黃散 寒七

解毒內托散 痘五

四苓散 和一

退火丹 痘八

實表解毒湯 痘四

導赤散 寒二

苦參丸 痘九

四味消毒飲 痘八

當歸丸

五 痘九

大和中飲

七 新和

六味消毒飲

九 痘四

三黃丸

八 攻六

小和中飲

八 新和

解毒防風湯

六 痘五

承氣湯

一 攻

肉豆蔻丸

六 小五

消風化毒湯

八 痘五

通關散

五 痘八

橘皮湯

二 痘九

涼血化毒湯

九 痘五

獨聖散

八 痘七

白氣散

三 痘九

普濟消毒飲

三 寒十

蟬退膏

六 痘四

化痰丸小九

消毒化癍湯痘五

無價散痘七

三酥餅痘八

養血化癍湯痘十

敗草散痘一

抱龍丸小八

涼血養營煎新因

胡妥酒痘百

保嬰丹痘百

玄參地黃湯痘八

水楊湯痘百

大連翹飲寒七

連翹升麻湯痘二

胭脂汁痘一

犀角散痘六

犀角地黄湯寒七

猪髓膏痘二

快癍湯痘七

快癍越婢湯痘七

蕎麥散痘一

鼠粘子湯痘七

射干鼠粘子湯痘七

茶葉方痘一

紫草飲子痘六

柴草木通湯痘七

白龍粉痘一

紫草飲痘六

紫草木香湯痘六

神授丹痘一

紫草散痘六

紫草快湯痘六

綿璽散

痘一  
三四

如聖湯

痘十  
一

加味甘桔湯

痘九  
十

痘疔散

痘百  
十四

甘桔湯

因一  
七五

拔萃甘桔湯

因一  
七六

陰陽散

外一  
三三

四聖丹

痘百  
十五

參芪四聖散

痘八

吹口丹

痘一  
三六

玉鑰匙

因一  
九三

加味四聖散

痘十

搽牙散

痘一  
三五

辟邪丹

痘百  
三十

萬氏四聖散

痘百  
十六

茵陳薰法

痘百  
十九

人參白虎湯

寒三

四順清涼飲

攻二五

局方涼膈散

痘十

東垣涼膈散

痘八

前胡枳殼湯

痘九

萬氏奪命丹

痘八

神應奪命丹

痘八

救苦戒癩散

痘一

萬氏牛黃清心丸

小九

神效當歸膏

外三一四

太乙膏

外三

景岳全書卷四十四